

# *KGAKOLO*



Modimo a o hlohonolofatse, moena. Ke leboha haholo.

<sup>2</sup> Dumelang bohole hoseng. Ruri ke monyetla o moholo ho ba mona hoseng hona kerekanaeng e ntlenyana ena, tshebeletsong ya kgakolo botjha. Jwalo kaha ke qoqile le Kgaitsemi Hoover ka phaposing e morao, o boletse, kea kgolwa, e kile ya eba wa kereke ya Pilgrim Holiness kapa ya United Brethren. Pilgrim Holiness, ke a kgolwa. E. Mme jwale e kgakolwa botjha bakeng sa Evangedi e tletseng, mme ena ke tshebeletso ya kgakolo botjha.

<sup>3</sup> Mme modisa wa yona ya motle, jwalo ka ha re tseba, Moena Hoover ke mohlankanyana ya tshepehang ya ikgethileng.

<sup>4</sup> Mm'ae, ke ne ke mo tseba, dilemong tse fetileng, yena le lelapa la ka e ne e ka... Bana, ba bile ba mmitsa, "Mme Hoover," hoba o ne a batla a... O phetse le rona nako e telele bana ba sa le banyenyane, mme—mme ba mo tsebile ka tselo eo, mme wa morapedi, mohalaedi wa kgale.

<sup>5</sup> Mme moshanyana wa hae ya kgabane wa moreri eo a mo rapeletseng hakaalo, o file Kreste bophelo ba hae, mme a kgethela bophelo ba hae ditshebeletso tsa Modimo YaMatlawohle. Mme jwale, kajeno, o eme, le ho thea kereke, kapa mohaho mona, moo esale o ema nako e telele o sa sebetse, ho tswelapele ka Evangedi, ka mokgwa wa Evangedi e tletseng, tekanyo.

<sup>6</sup> Mof. Hoover o na ntsa mpolella, Mof. L.G. Hoover, o na ntsa mpolella hore ke moradinyana wa hae ya neng a letsa sefela, metsotsong e mmalwa e fetileng, pina e tla latela ya *Dumela Feela*, mme ke seletsi sa piano mona e—e pianong. Dikgwedi tse tharo tse fetileng, ha ba ne ba kena, ba... o ne a sa kgone le ho letsa lehlaso. Empa jwale o kgona ho lets. Ehlide hoo ho hotle, ho hotle haholo.

<sup>7</sup> Ke na le ngwanana ya dutseng morao mona, esale a tsamaya dithuto tsa mmimo dilemo tse ka bang hlano tse fetileng, kapa ho feta, mme ha ke tsebe ho nqositse bo kae, le piano e ntjha. O ne a sa kgone le ho letsa sefela hamonate jwalo ka ha ngwananyana eo a kgonne. Ho bontsha seo ditalenta tse abilweng se-Modimo di leng sona, e ntoo ba ntho eo o lekang ho itlhahisetsa yona. Le a bona?

<sup>8</sup> Jwale, re motlotlo ha Modimo a file batho bana sebaka sena. Mme ke tshepile hobane e tla ba ntlolesedi e kgolo karolong ena ya nahane.

<sup>9</sup> Jwale, hangata bohole ba batho bo hopola hobane ha ba bona phutheho... Mme ba ye ba nahane, "Be, kerekana ena e

ke ke ya kenya batho ba bangata haholo.” Mme—mme kea kgolwa Moena L.G. o mpoleletse, kapa ka mokgwa o itseng, hore phutheho ya hae e ka ba batho ba mashome a supileng kapa a robedi, le ntho e kang eo. Mohlomong ke ka tlasana kapa ka hodingwana ho feta, empa e tsamaela mono, e sa qala feela.

<sup>10</sup> Ba ka nahana, “Be, sheba dikereke tse...ho pota naha kajeno, phutheho tsa bona di balwa ka dikete.” Mme mohlomong, tse ding, tsatsi ka leng la tshebeletso ba na le dikete.

<sup>11</sup> Empa kgothatsa sehlotshwana sena, hantle-ntle hase seo Modimo a se shebang, dipalo. O—O sheba...Ha A ke a Ithea hodima bongata, empa hodima boleng. Le a bona?

<sup>12</sup> Re bona kgaolong ya 19 ya Diketso ka hara Bibele, moo, “Yaba Pauluse o haola le lebopo le ka hodimo a tla Efese, mme teng a fihlela kereke.” E ne e le kereke ya Efese, e le ya pele mongwaheng wa kereke, yona e lemohuwang Tshenolong ya Kreste. Mme ka hara kereke ena mona, ho ne ho ena le batho ba leshome le metso e mmedi, kamoo ho ngodilweng ka teng. Palo eo e ne e le batho ba leshome le metso e mmedi.

<sup>13</sup> Empa hola kereke ena e ne e na le leshome le metso e mmedi feela, kapa jwalo ka kereke eo, mme e inehetse ho Modimo ka botlalo, A ka sebetsa haholo ka ba leshome le metso e mmedi ho feta kamoo A ka kgonang ka lefatshe lohle. Ke boinehelo boo re nang le bona. Moo Nnete ya Evangedi, e sa tsweng kalaneng feela, empa e iphumanela moalo dipelong tsa batho mme e a arabela. Ka baka leo ke nka hona e le monyaka hoseng hona.

<sup>14</sup> Ha ke kena monyako, ke utlwile Moena Beeler a nyehela thapelo, mme ka mo nahana e le mokaubere, mme lena e le Letsatsi la Poelano. Mme, ehlide, bohole re motlotlo ha ho bile le Letsatsi la Poelano. Mme ho ka boela ha tshwarwa e—e letsatsi la poelano mona kerekeng, moo batho ba kileng ba kenela ntwa ya ho itwantsha, kgahlano le Modimo, ba ka tekenang poelano kajeno, ba ba le kgotso le Modimo, ka Jesu Kreste. Ke a kgolwa Baroma 5:1 e itse, “Jwale ha re beilwe ba lokileng ka tumelo, re na le kgotso ho Modimo ka Jesu Kreste Morena wa rona.”

<sup>15</sup> Mme jwale ke lemohile ba bang ba batho ba dutseng mona, Moena le Kgaitseid Bryant, le metswalla e meng mona e tswang tabernakeleng. Jwale, hoseng hona, ke ne ke tlo bua ka temana ya sekolo sa Sontaha hoseng hona tabernakeleng, empa ke e fetiseditse bosius bona, ka baka la ho tla kwano kgakolong ena. Ditshebeletso di tla qala pejana bosius bona, le a bona, tabernakeleng. Ke ikemiseditse ho ba kalaneng, ke itokisettsa ho bua ka hora ya bosupa, re tle re se ke ra dieha. Mme ke na le e—e molaetsa o molelele. Temana ke: *Hobaneng*

*Ke Bile Kgahlano Le Borapedi Bo Hlophilweng.* Mme taba eo e rutwa Lengolong. Ka baka leo, lona batho ba tabernakeleng, ba mono, tjhe, le fihle pele ho nako.

<sup>16</sup> Jwale, Moena Hoover, ha—ha ke tsebe nka leboha Morena jwang, hoseng hona, ka mohlanka ya inehetseng ho Kreste, le hara batho ba habo mona, ho tlisetsa batho molaetsa o tlotlehang ona wa Kreste. Nna ka bona, ke moKentucky. Ke tsya tlasana mona tseleng, motsaneng o bitswang Burkesville. Mme kea . . . ke kopa lona batho ba tikolo ho ena mona, jwalo ka moKentucky ho e mong, tlong le tlo mamela moshanyana enwa. Tswang le kene hara batho mona, mme le tumise ditaba ka nqa tsohle, mme le kene. Ba kenyeng ka hare. Ha ho hlokahala, Bibele e itse, le ba qophelle, le ba hatelle ho kena. “Eyang le mebila le mapatlelong le—le be le ba qophelle,” hoo ke ho hatella, “ho kena ka hare.”

<sup>17</sup> Mme Moena Hoover, ke mo tsebile dilemo tse mmalwa jwale. Mme ke mo tseba e le moshanyana wa morapedi, ya ikgethileng. Morena a ke a hlohonolofatse maiteko a hae wohle. Ke utlwile khwaere ya lona e nyenyan. Ka—ka leka ho hlwedisa monyako, mme—mme ka utlwa khwaere e nyenyan e bina, “Ak’o kholisehe.” Ke hantle.

<sup>18</sup> O ka tlatselela ka nthong e nngwe, empa ha ho fihlwa pheletsong ya hao ya BosaFeleng, o mpe o kgodisehe. O a bona? Hopola hoo kelellong, “Kgodiseha ruri, ruri.” O se ke wa etsa phuphe-ka-lefe. Ha o kena reshurenteng, mme o reka sejana sa sopho, mme ho ena le seokgohadi ka hara sopho eo, ruri o ne o tla e kgutlisa. O ne o sa tlo e thetsa ho hang, tjhe, monghadi, hoba mohlomong e ka o bolaya. Tjhefu ya seokgo sena, se phehetsweng le sopho ena, e ka qosa lefu la hao. Ka hona ha o fela o le hlokolosi ka mmele ona, o tlamehang ho shwa, o a bona, o reng ka moyo oo o sa tlamehang ho shwa?

<sup>19</sup> Ka hona ke rata Lentswe lohle la Modimo ka sebopheho sa Evangedi e tletseng. Mme ka hona kea tseba mme kea dumela, mme ke na le tshepo ya hore Moena Hoover o tla baballa tshepiso ya hae ho Modimo, ho E rera ka bokgoni bo kgabane ba tsebo ya hae, Evangedi e tletseng.

<sup>20</sup> Ho dula mono, ho utlwa seletsinyana seo sa piano se tidinya lehlaso leo, *Dumela Feela*. Mora wa ka, Billy Paul, ha ke kgolwe a le teng mona, hona jwale. Empa ke itse, “Billy, o utlwa piano-nyana eo ha e tidinya lehlaso la *Dumela Feela*?” Ke utlwile thokonyana eo nka re ka puo ka nngwe tla Lehodimo, e mpiletsha kalaneng, ho tloha diterekeng tse hwammeng tsa Arktiki ho ya kena kwana dikgweng tsa tropiki tsa Borwa, tla lefatshe, ho pota lefatshe. *Dumela Feela*, ka medumo ya mantswe a mefuta-futa, e mpiletsha kalaneng. Tsatsi le leng, mohla ‘phelo ba ka bo fedileng lefatsheng, ke kgolwa ba tla e bina ha ba . . . ha nke ke ka phelela ho bona ho Kgutla ha Hae, mohla ba mpatang. Ke dumela Jesu Kreste.

<sup>21</sup> Jwale, ke tshwere Mangolo mona, ao nka ratang ho lebisa ho wona, kgakolong botjha ena ya mohaho, e tswa ka hara Bibebe. Mme ke nahana, jwale, hobane kereke ena ha e kgakolelw e mokgatlo. E kgakolelw tshebeletsong ya Modimo.

Ha re inamiseng dihloho tsa rona motsotso feela jwale, re sa rapela.

<sup>22</sup> Ntate ya mohau le ya Halalelang, ere re sa ema pel'a Sefahleho sa Hao, ho siya phaposi ena, ka tumelo, re atamela Terone ya Modimo, moo Aletare ya gauta e sarolohang ho qala lehodimong ho isa lehodimong, moo motho ka mong ya shwang, tumelo, morabe, kapa mmala a nang le tokelo ya ho tla, mmopuwa e mong le e mong, moo Kreste a shweleng A ba a ipeha hodima Aletare eo, e le nyehelo ya rona ya sebe. Re na le tokelo ya ho atamela ka sebete Teroneng ya mohau. Re O leboha ka monyetla o moholo ona oo re o fumaneng kajeno, le oo re nang le wona. Re O leboha ka setho se seng le se seng sa Mmele wa Hao lefatsheng kajeno, se tiliheng Teroneng e kgolo ena, mme ba amohetse nyehelo ya kgotso, le kgotso e fetang kutlo, ya Evangeliedi.

<sup>23</sup> Jwale re rapella, Modimo, kerekana ena, sehlopha sena sa batho se etelang mohaho o monyenyanne ona hoseng hona kgakolong ya lerato, le mosebetsi wa matsoho a bona le pelo, ho lokisa sebaka seo batho ba ka tlang ho sona, ho rapela. Mme rea rapela, Modimo, hore O tle o hlohonolofatse maiteko a bona. Mme re O rapela ho hlohonolofatsa molebedi, moena rona ya mosa, le mofumahadi wa hae, lelapa la hae, batikone, diteraseti, lekgotla, le ditho, le bohile, mmoho.

<sup>24</sup> Mme jwale re sa phetla Lentswe la Hao, kajeno, e le ho kgothatsa, ho tsebisisa ha eba dintho tsena tseo re di etsang di bapile le Lengolo, hoba ho morao ho feta ka moo re hopolang kateng. Re utlwa, kajeno, ho se nako e ngata e setseng. Empa re tlamehile ho ema le ho sebetsa. Re tshwanetse re be re hatella mme re qophella, setho se seng le se seng se tlotseditsweng Mmele wa Kreste, e sa le pele, re tle re hase Molaetsa ho fihlela motho e mong le e mong a utlwa, ho fihlela re kgodisehile hore boiteko bo bong le bo bong boo re neng re tlamehile ho bo kenya bo kentswe. Ntate, hlohonolofatsa Lentswe la Hao, le ho bua le rona jwale ka Lentswe la Hao, re sa mametse ka dipelo tse lethwethwe le ditsebe tse butsweng, ho amohela seo O tla re tsebisa sona ka thabo. Re e kopa ka Lebitso la Jesu. Amen.

<sup>25</sup> Jwale, ho ka ba le ba bangata ho lona, etswe e le tlwaelo, ke hore ka nako tse ding batho ba tshwaya Mangolo, kapa ho A ngola, kapa ho ngwapa dintlha. Mme le nna ke etsa jwalo. Mme ha le rata ho phetla le nna jwale, palong ya Lengolo la pele, ke tshwere dibaka tse tharo tseo ke batlang ho bala ho tsona hoseng hona. Mme mono, ke Dikronike tsa Pele 17:1 ho fihla ho 2, le Diketso 7:44-49, le Baheberu 10:1...5.

<sup>26</sup> Jwale pele re bala ho Dikronike, Dikronike tsa Pele 17, ho qala ka temana ya 1. Mme ebe, bobeding, re bala Bukeng ya Diketso tsa baapostola, e—e kgaolong ya 7. Re tla rata ho qala ho bala temaneng ya 44 ya kgaolo ya 7 ya Diketso, wohle a motjheng wa kgakolo ya tempele. Mme e nt oo ba Baheberu 10:5.

*Etitse, ha Davida ha a se a kene tlung ya hae, Davida a re ho moporofeta Nathane, Bona hle, nna ke ahile tlung ya kedare, athe areka ya selekane sa Morena e dutse tlasa masela.*

*Yaba Nathane o re ho morena, Etsa tsohle tse ka pelong ya hao, hobane Jehova o na le wena.*

*Bosiung bona boo, lenseswe la Modimo la tlela Nathane, la re,*

*Tsamaya . . . bolelle mohlanka wa ka Davida, JEHOVA o re, Hase wena o tla nkgahela ntlo eo ke tla dula ho yona:*

*Athe ha ke eso ho dule tlung, ha e sa le ke nyolla Israele Egepeta ho fihlela jwale; ke mpa ke nnile ka tswa tenteng e nngwe ka kena ho e nngwe, ka tloha tulong se seng ka kena ho se seng.*

<sup>27</sup> Jwale Bukeng ya Diketso tsa baapostola, ho qala ho 7, le temana ya 44.

*Bontata rona ba ne ba na le tabernakele ya bopaki feelleng, ka moo ya buang le Moshe, a neng a mo laelie kateng, ho e etsa ka setshwantsho seo a se boneng.*

*Etitse hobane bontata rona ba e newe ba ya le yona le Joshua lefatsheng la Ditjhaba, tseo Modimo o di lelekileng pela bona, ya dula teng ho fihlela mehleng ya Davida;*

*Eo a bona mohau pela Modimo, mme a lakatsa ho batlela Modimo wa Jakobo tabernakele.*

*Salomone ke yena ya o hahetseng tempele.*

*Empa Ya hodimodimo a ke ke a aha ditempeleng tse entsweng ka matsoho; jivalokaha moporofeta a boletse,*

*Lehodimo ke terone ya ka, mme lefatsheng ke bonamelo ba maoto a ka: ntlo eo le ka nkahelang yona e ka ba e jwang? ho bolela Morena: le nqalo eo nka phomolang ho yona e ka ba efe?*

*Na matsoho a ka hase ona a entseng ntho tseo kaofela na?*

<sup>28</sup> Mme Bukeng ya Baheberu, kgaolo ya 10 le temana ya 5.

*Ka baka leo mohla a tla tla lefatsheng, o itse, Ha o a ka wa rata sehlabelo leha e le dinyehelo, empa o ntokiseditse mmele:*

<sup>29</sup> Re tlwaetse palo ya Mangolo ana ao re batlang ho bua ka wona metsotso e mmalwa.

<sup>30</sup> Jwale, Davida, tlaša takatso le tshenolo, a nahana pelong ya hae, ntho e kgabane haholo. Etswe, Davida, ka ho ba monna ya lokileng, mme a ratwa haholo ke batho, le Modimo o ne a mo hlohonolofaditse ka ditsela tse ngata. Mme o itse, “Ana ke tshwanelo ho nna ho dula mona tlung e ntle eo Morena a mphileng yona, athe areka ya selekanne ya Modimo wa ka e dutse tlaša masela?” Eo e ne e le ntho e kgabane. E ne e le tshenolo, ho Davida ho tseba taba ena. Hoba ho yena e ne e se hantle ho ba le sebaka se—se setle hakaalo, tlaša ntlo e entsweng ka kedare, etswe e ne e le epatsi e theko e thata; mme yaba o re, “Areka ya selekane sa Modimo wa ka, Ya mphileng dintho tsena tsohle, e ntse e le ka ntle kwana tlaša tente.”

<sup>31</sup> Mme Nathane, moporofeta, ka ho tseba hobane Modimo o no o e na le Davida, a re, “Davida, etsa tsohle tse ka pelong ya hao, hobane Modimo o na le wena.” Ka mantswe a mang, ha Modimo a o fa tshenolo, e etse. Empa hoo hohle ho ne ho sebetsa.

<sup>32</sup> Mme bosiusung boo, Morena a etela seboni sena, le moporofeta Nathane, le ho re, “Tsamaya o bolelle mohlanka wa Ka, Davida.” Le a bona? Ke rata hoo. Oh, ka mantswe a mang, “Ke tsota sebete sa hae, le mehopolo ya hae ka Nna, ho Nkahela tulo. Empa,” A re, “Ha Ke—Ke eso ho dule tlung. Ha Ke eso ho be le sebaka sa ho dula ha Ke theohela lefatsheng, ho sheba batho ba Ka. Ha Ke eso ho fumane sebaka sa ho dula, ho tloha Ke nyollotse Iseraele. Ha Ke eso ho laele le e mong ho baahlodi ho Nkahela ntlo ya kedare, empa Ke tlohile tulong ho kena tulong e nngwe.” E batla e se mokgwa kajeno! “Ke tlohile tenteng e nngwe ho kena tenteng e nngwe, le tulong se seng ho kena ho se seng, ho kopana le batho ba Ka.”

<sup>33</sup> A re, “Tsamaya, o bolelle Davida,” kamoo Lengolo le balehang ha le tswelapele, “Ke ne ke o late merakeng, ka mor'a dinku tse mmalwa tsa ntat'ao. Mme ka o etsetsa lebitso le leholo le kang mabitso a ba baholo ba leng teng lefatsheng. Ke bile ka fedisa dira tsa hao, ho qala ho le letona ho isa ho le letshehadi. Ke a o rata, Davida. Mme Ke tseba hobane ditakatso tsa hao di lokile. Ke tseba hobane merero ya hao e tshepehile. Mme Ke a tseba hobane o a Nthata.”

<sup>34</sup> Le ka bona Dipesalema, kamoo Davida a sa phetseng, ho nahana ka Modimo. Boholo ba rona kajeno bo nahana ka dikatleho tsa rona, seo re ka se etsang ho intlafatsa. Empa Davida o ne a sa phetse ho nahana ka seo a ka se etsetsang Modimo.

<sup>35</sup> “Ke tseba ditakatso tsa hao, Davida. Ke batla o tsebe seo Ke o etseditseng sona. O no o le moshanyana, o sa tsejwe ke motho, mme ntho tsa hao... esita le ntat'ao a o fa dinku tse

mmalwa mono ho di alosa. Empa Ka ba le wena. Mme ka fedisa dira tsa hao, ho qala ho le letona ho isa ho le letshehadi. Empa ditakatso tsa hao di nepahetse. Empa, Davida, o monna wa ntwa. O monna ya tsholotseng madi. Nke ke ka o dumella ho etsa sena. Empa Ke o tshepisa hobane ka tholwana e tswang lethekeng la hao, Ke tla o hlahisetsa mora, mme ke yena ya tla haha tempele.”

<sup>36</sup> Jwale, bohole re tseba hobane dintho tsa lefatshe di tshwantsha tsa Lehodimo. Dintho tsa nama di mpa di tshwantsha tsa moyo. Yona... Ruri, Eo A na bua ka yena e ne e le Kreste, bakeng sa Tempele.

<sup>37</sup> Empa e ne e le Salomone, mora wa Davida, ka tlhaho nameng. Hamorao, re bala ho Marena a Pele, ha le rata ho e bala, hore o—o ile a haha tabernakele eo Davida a na tla e haha, hoba Salomone e ne e le monna wa kgotso, wa bohlale. Ha a ka a ya ntewng, jwalo ka Davida, mme a tsholla madi a mangata. E ne e le monna wa kgotso feela. Mme Modimo wa mo fa bohlale mohla a kopang seo a se batlang, ka pel'a Modimo, a mpa a kopa bohlale ba ho tseba ho tsamaisa batho ba Hae. Mme ha a ka a nka dineo tse kgolo etswe hoo ho ka be ho no ho etswe, a mpa a ikopela bohlale ba ho tseba tsela ya ho—ho tsamaisa batho ba Modimo ka bokgabane bo kgonehang.

<sup>38</sup> Mme ke nahana, rona, thapelong, ka borona, hola re ka kopa hoo feela, kutlwisiso feela, ntho e tla hlahisetsa batho ba Modimo molemo. Ke dumela ruri e le kgopololo ya molebedi enwa ya ho tlisa kereke ena mona, le a bona, ho nka kereke e na ya kgale le ho boela e kgakolwa botjha. O leka ho fumana setshabelo puleng, le lehlweng, le jwalo-jwalo, bakeng sa batho ba Modimo. Ke nahana Modimo a tla hlompha hoo ka ho moshanyana enwa, jwalo ka ha A entse ho Davida.

<sup>39</sup> Jwale, re fumana, mona ho robetse moelego o moholo wa moyo, oo ke ratang ho lebisa ho wona haholo-holo. Jwale, ha o bala Marena a Pele, o tla fumana hhono, mona. Salomone o qala, e le mohlankanyana, ho haha tempele ena eo ntat'ae a na e tshepisitswe, ka Modimo, ho e haha. Le a bona, o dula motjheng wa Mangolo le ditshepiso. Jwale, ke seo re tshwanelang ho se etsa kamehla, ho atleha, ke ho dula motjheng wa ditshepiso tsa Modimo. Ho sa tsotelehe kamoo ho bonahalang ho lokile ho tswa le ka *mona*, kapa ka *mane*, dula motjheng wa Mangolo. Mme Salomone o tsebile hobane Modimo o no o tshepisitse ntat'ae, Davida, hore o tla haha tempele.

<sup>40</sup> Jwale, ha le ka lemoha, thepa ha ya fumanwa Palestina feela, eo, tempele ena, kahobane e ne e se mono feela. A lokela ho ya ka lefatshe lohle, lefatsheng le tsejwang, ho fumana dikarolwana tsena tse tla kena tempeleng ena.

<sup>41</sup> Ke moelego o motle hakakang oo, ha e le moo Modimo a sa kguthule thepa ya Hae ka Bajuda ba nnotshi, kapa ka ba basweu ba nnotshi, kapa ka ba basootho ba nnotshi, kapa ba ba kgubedu, kapa ba batsho, kapa mebala efe feela ba leng yona, kapa seo e leng sona, Dinaheng tse Kopaneng feela, kapa Canada feela, empa O kgephola thepa ya Hae lefatsheng lohle.

<sup>42</sup> Mme ha eba ba ne ba kgephola lejwe la mofuta o itseng o nong o fumanwa karolong eo ya na ha, mme mohlomong ba kgephola lejwe kwana setjhabeng se seng, ho lekana lejwe lena le kgephotseng ho...setjhabeng se seng. Jwale, ho batho e ile ya bonahala e le ntho e ho sele, ba-feta-ka-tsela ba boneng ho kgephola majwe a sa tlwaeleheng ana. Empa Modimo, ka tsela ya Hae ka Sebele, o ne a etsa ho hong.

<sup>43</sup> Ke dumela hobane O etsa ho hoo, kajeno, ho—ho nepahatsa papiso eo. O ba kgephola kamoo ho ratang Yena kateng.

<sup>44</sup> Jwale re fumana, hobane thepa e kgephowlwang lefatsheng la yona la botala, e ne e roneha ho—ho thepa e kgephowlwang lefatsheng le leng la botala. Mme re fumana tsohle di ne di tsamaiswa ho tswa teng, ka koloi ya dipholo, le jwalo-jwalo. Mme tse ding di tla ka lewatle, le tse ding ka koloi ya dipholo, mme tse ding di sesisetswa Joppa ka sehleka, le jwalo-jwalo, mme di ntso hulelwa ka hare. Tsohle mmoho, di ne di tla setsheng se le seng, ka morero o le mong, mme e ne e le ho phethahatsa molao wa Modimo.

<sup>45</sup> Mme dikedare di ne di rengwa hodimo kwana Lebanon. Mme dikedare tsa Lebanon e ne e le dikedare tse tummeng ka ho fetisa lefatsheng lohle. Jwalo ka kajeno, ho na le sebaka se le seng moo ho fumanwang patsi e kgubedu, moo ke California. Mme tulo e teng, ba e bitsang, kwana Afrika, Mossel Bend, ho na le patsi e tumileng mono e bitswang stinkwood. Ha e fumanwe kae kapa kae ha e se mono. Mme ho fumanwa dipatsi tse fapaneng ditulong tse fapaneng tsa na ha. Mme dikedare di ne di fumanwa Lebanon, kedare e telele haholo, e thata, kahobane e ne e le na ha e futhumetseng. Patsi e eketsa ho thatafala, ha na ha e ntse e futhumala. Mme—mme e eketsa ho nolofala, ha na ha e ntse e hatsela.

<sup>46</sup> Le mono, ho na le moelego wa moyo. Ho hatsela le ho se tsotelle, bonolo le ho phaphamala. Empa ha e futhumetse, e tletse Moya, e momahana mmoho mme e ka sebediswa ke matsoho a Monghadi.

<sup>47</sup> Jwale re fumana hobane dikedare tse kgolo tsena di ne di rengwa ke baremi. Mme di ne di...ba ne ba tshwere dipolane. Mme ba di kopanya ba di bokella ho tswa ka makgalo a lefatshe.

<sup>48</sup> Jwale, ha le ka elellwa, Salomone ha a ka a kgeloha le hanyenyane moraloo oo Moshe a o boneng Thabeng ya Sinai, Lehodimong. Moshe, hoba a kgutle ponong ya hae, a hloma

tente, mme a e etsa hantle kamoo a e boneng Lehodimong. Mme mohla Salomone a na haha tempele, o e entse hantle ka moo a—a boneng moralo, papiso. Moshe o ile a hloma tente, e le—e le papiso ya kamehla, kahobane e ne e tloswa tulong se seng ho ya ho se seng. Empa, Salomone, o entse e—e tabernakele hantle ka moo Moshe a e boneng Lehodimong. E ne e kopantswe yohle mmoho, e hlophisitswe, ka nepo hantle.

<sup>49</sup> Ke moelelo o mo kakang wa moya re ka o kenyang mona, hore ha rea lokela ho tlohela Lengolo le ka mohla. Tsitlallela paterone hantle. Ke lona lebaka leo, ke dumelang, hobane ka moo moralo wa Kereke ya pele o no o le kateng, le E latelang e tshwanela ho latela moraloo, ke ka moo e mong le e mong a lokela ho ralwa kateng, kamoo e neng e le kateng tshimolohong. Mme ke dumela hobane Modimo o e sebetsa jwalo, ke dumela jwalo, le ka Kereke ya nnete. Ho lokile.

<sup>50</sup> Dithepa, tse kgethulwang naheng tsa'bo tsona, di tliswa nqalong e le nngwe. Empa mohla di ne di tliswa mono...Ke bala kgaolo ya 16, kapa ke qotsa ho yona. Jwale, mohla di ne di tliswa mmoho, ke ha di lekana ka ho phethahala, hoo, ka dilemo tse mashome a mane tse qositseng mohaho, lejwe le le—le leng le sa kang la sagwa hape. Ho hoba ha saga ha ho a ka ha utlwahala, kapa modumo wa noto, ka dilemo tse mashome a mane. Le bua ka boqhetseke bobetling, boahing!

<sup>51</sup> Jwale, hoo ho bontshitse, hore, ha re etsa ntho efe kapa efe, mme re e etsa ka moraloo Modimo a re beetseng wona.

<sup>52</sup> Jwale, majwe ao bongata ba wona a ne a shebahala a hlolla haholo. Empa sebaka sa lejwe le leng le le leng le hlollang tempeleng se ne se le teng. Molimo o na a boloketse sebaka.

<sup>53</sup> Ditshebeletso tsa rona, e leng papiso e ntle mono, kapa yona ya sebele, di supa hobane, leha re hlolla, mokgwa wa rona wa borapedi. Empa, mohla Tempele, Tempele ya nnete eo re tla fihla ho yona ka mora metsotso e mmalwa, e kopanang mmoho, ho tla ba le sebaka sa motho e mong le e mong ya ilehang. Re ka nna ra shebahala re qabola mothong e mong, me ra itshwara ka mokgwa o batlang o qabola; empa, le hopole, sebaka sa rona se teng mono. Modimo o betla Kereke ya Hae.

<sup>54</sup> Mme lejwana ka leng le bileng le sebaka le ile la lekana hantle ho yona. Mme hopola, le ne le betlilwe, hole le setsha seo le tla kopanyetswa ho sona; empa, empa ha le kopana mmoho, ha lea ka la hloka ho ntlaufatswa. Le ne le se le ntlafaditswe. Modimo o no o le etseditse ho lekana sebaka sa lona ka ho phethahala.

<sup>55</sup> Oh, ke papiso e kakang re e fumanang mono, ya moya, kamoo neo e nngwe le e nngwe ya Modimo, boitshwaro bo bong le bo bong bo ilwang ba Bakreste ba tswetsweng la bobedi, ho hlolleng ha bona, empa bo na le sebaka sa bona. Bo a lekana Mmeleng. Bo kena madulong a bona a tshwanetseng.

<sup>56</sup> Mme bongata ba rona bo ka—bo ka leka ho re, “Jwale, taba eo hase ya Modimo,” lesole le lokileng, le halalelang, le itetseng la sefapano. Mme re re, “Jwale, re ne re eme ka hara kereke bosiu bo bong, mme ra utlwa *hore-le-hore*. Taba eo e ke ke ya ba ya Modimo.” Empa ha e tsepame motjheng wa Moralo, ha e tsepame le motjha wa Lengolo, e ka nna ya ileha, empa e tla ba le sebaka sa yona. Le a bona? E tla lekana hantle ka hare, e ke ke ya hloka le ho ntla fatswa kapa ho bentshwa. E tla kena sebakeng sa yona, hobane Achiteke e moholo, Kreste, o nts'a e lokisa hona jwale; e a ileha, e nngwe ho e nngwe.

<sup>57</sup> Jwale re a lemoha, mohahong tlase mona, kgaolong e latelang, hore, mohahong ona, ho ne ho na le lejwe le neng le hlolla haholo ho tshwenyana le lona, ka baka leo dihahi tsa le lahla. Ka hona ba le kodumetsa kwana khoneng, ha thwe, “Lejwe leo le hlolla haholo ho ka sebediswa. Ha ho sebaka se jwalo.”

<sup>58</sup> Jwale, le hopole, bahahi ke bona ba neng ba tshwanela ho tseba phapang. Jesu o buile ka yona.

<sup>59</sup> Empa, ha fihlelwa hobane, ba ne ba hahile mohaho o phahame ha ba ne ba haellwa ke lejwe leo. Mme ba sa tsebe moo lejwe leo le ne le le teng. Mohlomong ba hlahloba dikepe tsohle. Mohlomong ba shebisisa koloi e nngwe le e nngwe ya dipholo. Mohlomong ba romela barongwa ho ya fihla kwana Joppa, le tlase, ho thwe, “Ana ho fihlile ngata e nngwe?” Kapa, “Na le le lahlile tseleng? Phoso e teng. Ha re fumane lejwe leo la sebaka sena.” Mme ha ba sa le fumane, kae kapa kae, ha fihlelwa hobane, le ne le robetse hantle mobung. E ne e le lejwe la ntlha la motheo le lahluweng ke bahahi.

<sup>60</sup> Jesu o buile ka lona, mme a re, “Na le badile ka lejwe le lahlilweng ke dihahi? E ne e le lona lejwe la ntlha la sekutle, hlooho ya wona wohle, moo mohaho wohle o ne o itshetle hile hodima lona.”

<sup>61</sup> Mme ke nahana, hore e—e kahong ya kajeno ya ntlo ya moyo eo Modimo a rapelang ho yona, ke nahana ho hlahlile phosohadi e kgolo hara dihahi. Re tlide ka diphutheho tsa rona tse hlophilweng, mme re di theile ka botshepehi. Re rometse bashanyana ba rona sekolong, ho ba ruta ho bua hantle pel'a phutheho, ho ba ruta saekholoji le nalane ya Bibele. Mme re entse ntho tsohle, mme ra haha ditulo tse ntle tsa kereke, le ho etsa ditora tse telele, le mmuno o monate, le tse jwalo, re di ahile. Empa re fumana phoso e le teng. Re lekile ho e haha ka disebediswa tse entsweng ke motho, seo thuto e ka se hlahisang, seo disseminare di ka se hotollang ho bona, hore thuto ke efe. Ra leka ho e haha hodima thuto, hodima borutehi, hodima phutheho tse hlophilweng. Mme dintho tsena tsohle di ke ke tsa sebetsa ha feela re sa ka ra amohela Lejwe lena le hlollang, Lejwe lena le ilehang.

<sup>62</sup> Empa eitse ha mohaho o qala o ipha sebopetho, ba elellwa hobane lesoba le neng le setse, le ile la lekanwa ke lejwe le ilwang, ka nepo.

<sup>63</sup> Mono, ke hona, moo dihahi tsa kajeno. Mme ke ka hona mohaho wa Monyaduwa, wa Kreste, a eso itokisetse Monyadi, ke kahobane dihahi di lahlile lejwe la Sehlooho la Sekgutlo le beilweng ka Letsatsi la Pentekosta, e leng kolobetso ya Moya o Halalelang. Le a bona? Ha e sa le O ilwa. Batho ba itshwara ka tsela e sa tlwaelehang. Mme ba—ba sitwa ho kena taolong ya—ya saekholoji ya rona, thuto ya rona, ho ruteha ha rona, ditumelwana tsa rona. Ha o lekane mono. Mme ba O rahela ka ntle, hoba O ne o ileha, o sa tlwaeleha, o sa dumelane le e—e maano a rona ao jwalo ka batho re bileng le wona, maano a seo Kereke e lokelang ho ba sona.

<sup>64</sup> “Eka kgona e be sehlopha sa barutehi ba bentshitsweng. Eka kgona e be sehlopha sa batho ba aparang hantle. Eka kgona e be sehlopha sa ho hong, moo, re ileng ra leka ho e fetola lenaneo la thupello, kapa ntho e tla thabisa kutlo tsa rona tse hlano, ntho eo re ka e bonang, kapa ho e latswa, kapa—kapa ho e phopholetsa, kapa—kapa ho hong.” Boholo ba yona bo tlie ka pono. “Shebang batho ba rona ba batle. Shebang letshwele la rona le kgabane ka ho fetisisa motseng. Ramotse o kena ha rona. E—e balaodi ba sehlooho ba motse wa rona, hlooho ya sepolesa o kena kerekeng ya rona.”

<sup>65</sup> Mme ke moo re fumanang, ha ho fihlwa nthong ya sebele-bele, e—e mohaho, hohle hoo re ho fumanang ke seretsana le lejwe. Mme Mohaho o sitilwe ho tswelapele. Ba lahlile Tsela, Lejwe leo Modimo a O lokiseditseng lona. Ba Le lahlile.

<sup>66</sup> Jwale, re fumana hobane, leha ho le jwalo, kgaolong e latelang, mohla dihahi di ne di fumana hobane di positse. Athé, ba ne ba beile majwe a mang wohle mono, empa lebaka leo ba sitilweng ho a kopanya e le kahobane ho ne ho setse lesoba. Ha ba le ntho e sa lokang.

<sup>67</sup> Jwale, re se re fumane majwe, majwe ao Modimo a kgethileng e sa le pele. Le a bona? Mme re na le wona, ho qala kwana Efese ho fihla Laodisea. Re mpa re emetse lejwe la Sehlooho le lahlilweng ke dihahi, re emetse ho Kgutla ha Hae, Lejwe le kwahelang. Mme mohla . . .

<sup>68</sup> Majwe a maholo ana ke maipolelo. Jwale, rea tseba hobane maipolelo ke lejwe. Jwale, e . . .

<sup>69</sup> Batho beso ba Katolike ba bolela hore mohla e . . . ”Jesu a bua, mme A re, ‘Hodim’ a lejwe lena, kapa lefika, Ke tla haha Kereke ya Ka.” Jwale, kereke ya Roma ya Bokatolike e bolela, ho re, “E ne e le Petrose, hobane e ne e le lejwe, monna eo ka boyena, Simone Petrose.” O ile a kgutlela morao, matsatsi a

mmalwa hamorao. Jwale re fumana, he, hore Protestanta e re, "E ne e le Kreste, lejwe." Empa hase ho hanyetsa, empa ha le ka sheba Lengolo, e ne e se le e nngwe ho tsona.

<sup>70</sup> E ne e le maipolelo le tshenolo ya Petrose ya hore Kreste e ne e le mang. Hoba O botsitse potso, mme potso ke yona e neng e ameha. "Ke le Mora motho batho ba re Ke mang?"

<sup>71</sup> "Ba bang ba itse, 'Moshe, ba bang Elia, le ba bang, o a tseba, masapo a moporofeta e mong ya tsohileng, kapa ntho e nngwe. E ne e le yena."

<sup>72</sup> Empa A re, "Lona le re Ke mang?" Ke eo potso.

Petrose a re, "O Kreste, Mora Modimo o phelang."

<sup>73</sup> A re, "O lehlohonolo, Simone, mora Jona, hoba hase nama le madi tse o senoletseng hona. Ha wa ithuta yona bukeng. Ha wa ithuta yona seminareng le ka mohla. Empa Ntate ya Mahodimong o o senoletse yona. Mme hodima lejwe lena, tshenolo ya moyya ya Lentswe la Modimo," etswe Yena e ne e le Lentswe, "Ke tla haha Kereke ya Ka; mme dikgoro tsa dihele ha di ka ke tsa E hlola."

<sup>74</sup> Ke eo Kereke ya nnete; e seng ya seretse, le setene, le lejwe, le dintho tse jwalo, e leng tse timelang. Empa Kereke ya nnete e hahilwe hodim'a tshenolo ya Lentswe le thato ya Modimo. Mme ba beilwe Mmeleng, ho tloha mongwaheng wa phutheho ya Efese, tsela yohle ho fihla Laodisea hona jwale. Empa ke'ng...

<sup>75</sup> Ka letsatsi leo Salomone a ne a phethela tempele. Mme lejwe la sehlooho la sekhutlo, hang feela hoba dihahi di amohele ho lahlilweng, yaba mohaho o qala o nyoloha.

<sup>76</sup> Ha nke ke bue taba ena ka tshabo yohle le hlompho yohle ho motho e mong le e mong kerekeng e nngwe le e nngwe, le ho leano la motho e mong le e mong. Mohla dihahi tsa rona kajeno di amohelang Molahluwa, ho e na le ho ba qhelela thoko le ho ba bitsa "sekgakgatha sa bahalaledi ba thethehang, bailwa ba etsang maipolelo," Mohaho o tla phethelwa kapele-pele hakaalo.

<sup>77</sup> Empa na le lemohile? Hoba mohaho o phethelwe, e ntse e le mohaho o lelea. Ho se letho ka hara wona ntle le thepa. Ka hona Salomone a entse hohle ho a neng a ka ho etsa. Jwale, yaba ho fihla letsatsi le leholo la kgakolo, mohla ba tla kgakolela mohaho ona ho barapedi ho rapela ntho e nngwe. Jwale, ha ho se letho mono le rapelwang, ekabeba mohaho o eme lefeela. Empa jwale mohaho o no o le mothating wa kgakolo.

<sup>78</sup> Mme eitse ha Balevi le baprista, le dikete tsa diterompeta di phatlola sepakapaka; ho shwa konyana e nngwe ka mor'a konyana e nngwe, bakeng sa sehlabeled sa sebe. Mme Balevi ba nka madulo a bona, ba kena khoneng, mme ba nka mejaro ya

bona, ho e hokela mehweleng ya areka, moo matlapa a lejwe a ne a le ka hare. Matlapa a mabedi a lejwe; lejwe le tshwanang. "Bobedi bona bo bong," taelo e tshwanang, selekane se tshwanang. Mono, matlapa a mabedi ana, le dikerubime ka dipheyo tsa tsona tse otlolotswenga, le leng nq'a le leng. Etswe, Balevi bana, ke sehlopha se kgethehileng feela se neng se ka jara areka eo. Ho se motho ya ka e amang, ka ntle ho bona; hola a ka ho etsa, o ne a shwa. Mme yaba ba nka mejaro ena, ka tsebo ya hobane ba kgethetswa mosebetsi wa ntho e qoholehileng ena. Mme ba hokela mejaro mehweleng, jwalo ka ha ba ne ba laetswe (Moshe o na laetswe) ke Modimo, ho haha areka.

<sup>79</sup> Mme ba e phahamisa, ho e tlosa ditenteng tsa yona. Ba qala ba hwanta; le terompeta e lla, ho binwa dipesalema, mosi o lopalla o tswa diphoofolong tse shweleng tse nyehelwang Jehova. Ba tla ba feta hara mohaho wa kgakolo, ba ba ba e fihlisa moo e phomolang teng, moo e kgohlelang boholokwaneng ba madulohadi a maholo a na etseditswe yona. Mme eitse ha e lekana e dula, mme qetellong e fihla moo e phomolang teng, areka, Bibele e boletse, ho re, "Morena a theohela nqalong eo, Ya ba ya tlala tempele yohle. Topallo ya Mollo ya kena mono ka kganya e kgolo ya Modimo basebeletsi ba ba ba sitwa ho sebetsa, ka baka la kganya ya Modimo."

<sup>80</sup> Ke mohla e ne e fumana sebaka sa yona sa ho qetela sa phomolo, kganya ya Shekina e latetseng bao; lejwe la hloro, e seng la sekutlo; lejwe la hloro, ntho ya sehlooho. Majwe a mang wohle a na a sa thusetho ho fihlela lekgatthe leo. Empa lejwe lena la sehlooho la fihla, lejwe la hloro, mme la dula tulong tsa lona tsa phomolo, bakeng sa moloko oo. Kganya ya Modimo ya tlala sebaka seo ba dutseng ho sona, mme kganya ya Shekina e le hodim'a mohaho wohle. Mme kganya e le kgolo hoo baprista ba sitlweng ho sebetsa ka baka la kganya eo.

<sup>81</sup> Jwale, re bala jwale, le ho qala kgakolong ya tempele. Ha re yeng jwale ho Diketso kgaolong ya 7 hape, le temaneng ya 44, mme re qale ka qotsa. Setefanase, therong ya hae e tumileng ha a rera, o itse, "Salomone ke yena ya O hahetseng tempele, hobane ho ne ho tshepisitswe ka Davida a tla etsa hoo." Modimo o no o tshepisitse Davida hore o tla haha tempele. Mme Modimo...

<sup>82</sup> Ka papiso, e neng e tla tloswa ke ntho ya sebele, jwalo ka ha sehlabelo sa dikonyana kgakolong e ne e le papiso ya Konyana ya nnete e tlelang sehlabelo. Dintho tsohle tsa nama di bapisa tsa moyo.

<sup>83</sup> Mme re fumana hobane, mohla ho no ho etsahala hona, Setefanase o bua ka yona. O itse, "Bontat'a rona ba fumana mohau pel'a Modimo, mme Salomone a Mo hahela tempele. Empa, fale, Ya Hodimodimo ha a dule ditempeleng tse

entsweng ka matsoho. Jwalo ka ha moporofeta a boletse, “Lehodimo ke Terone ya Ka, mme lefatshe ke bonamelo ba maoto a Ka, mme e kae ntlo eo le ka Nkahelang yona? Lehodimo ke Terone ya Ka, lefatshe ke bonamelo ba maoto a Ka, mme le ka hla la Nkahela ntlo ya ho dula jwang?””

<sup>84</sup> Hape, kamoo Baheberu 10:5 e babatsehang, “Empa O Ntokiseditse Mmele,” ho supa hobane Modimo o no o tla aha Mmeleng. [Sekgeo lebanteng—Mong.] “...Ntokiseditse.” Oh! Mme hoba Mmele ona o etswe sehlabelo, Konyana ya nnete e ne e hlabilwe, yaba ho hlaha teng, Modimo wa tla Mmeleng wa Hae ka Sebele, oo e neng e le Monyaduwa wa Hae.

<sup>85</sup> Mme ha ba le ditempele tse lekgolo le mashome a mabedi tseo Modimo o no o di bopile, di itokiseditse ho kgakolwa, tse neng di batotse di ntshitse ho se dumele hohle ho tsona. Mme tsa kopana phaposing e kahodimo, le ho ema matsatsi a lesome, bakeng sa tshebeletso ya kgakolo. Yare hobane di inehele ka botlalo, Modimo wa boela wa theoha ka kganya ya Shekina, le ho tlatsa ntlo yohle eo ba ne ba dutse ho yona. Modimo o ile wa etsa'ng? Jwalo ka areka e khohlelang boholokwaneng ba yona ba tshwanelo bakeng sa molaetsi wa letsatsi leo, Modimo wa boela wa khohlela kanaleng ya Wona ya tshwanelo; e seng ka hara phutheho e hlophilweng kapa mohahong o entsweng ka matsoho, empa ka hara pelo tsa batho. A khohlela sebakeng sa Hae, bakeng sa letsatsi la qetelo, e leng ho boletseng ke moporofeta Joele. “Mehleng ya bofelo, Ke tla tshela nama yohle ka Shekina ya Ka. Ho be ho porofete bara ba lona le baradi ba lona. Bahlanka ba lona ba lore ditoro. Maqheku a tla bona dipono.” Modimo o ile wa tla nqalong ya Hae ya phomolo, moo A fumanang phomolo. E seng ka hara mohaho, empa ka hara pelo tsa batho ba Hae, O fumana phomolo.

<sup>86</sup> Ke dihlong tse kakang, ke tlottollo e kakang, kamoo boiphihlelo ba maiketsetso ba Nimrode bo khehlemantsweng kateng mohlang oo! Mohla Nimrode a lekang ho haha e—e mohaho kapa mokgatlo o tla fihla mahodimong, Modimo wa o dubakanya. Wa fetoha sesomo, ho e na le ho thusa batho. A ferekanya puo ya batho. E mong a sa khone ho bua le e mong. Ya thuha tlamo ya boena.

<sup>87</sup> Empa eitse ha Modimo a tla tempeleng ya Hae ka Sebele, Kereke, e—e batho, eitse ha A fihla ho bona, A E tlatsa, ditempele tse neng di kgakolwa.

<sup>88</sup> Jwalo ka ha A entse tempeleng ya Salomone. A e tlatsa, e seng ka ditumelwana, e seng ka diphutheho tse hlophilweng, empa ka sebele sa Hae. A tlatsa ditempele ka kganya ya Hae ya Shekina.

<sup>89</sup> O entse hoo ka Letsatsi la Pentekosta. A tlatsa ditempele tseo tse lekgolo le mashome a mabedi tse ka hodimo ka mono,

ka boYena, ka Moya o Halalelang ka boWona. Kganya ya Shekina ya pholletsya ya dula hodim'a bona. Mme seo Nimrode a sitlweng ho se fihlela, ho haha tempele moo motho e mong le e mong a na a bua kgahlano le seo a neng a ka se utlwisisa; Modimo o ile wa theoha, mme ka puo e le nngwe ya Galelea, a lokisetsa hore mang le mang A utlwisise seo A na se bua, mme ba tseba hore e ne e tlisitswe. Ke eo Modimo tempeleng ya Hae. Modimo tempeleng ya Hae e kgakotsweng, e seng boiphihlelong bo qapilweng ke motho, e seng ho se entsweng ke motho; empa seo Modimo a se entseng ka boYena.

<sup>90</sup> Oh, ke bosawana, ho batho. Ha ba e utlwisise. Ba tswaletswe hore ba se ke ba e tshwara, ka baka leo ba ke ke ba e tshwara. Bibele e rialo. Ho lokile.

<sup>91</sup> Modimo o tlatsa tempele ya Hae kamehla. Ka tsatsi la kgakolo O tlatsa tempele ya Hae. O e tlatsa ka boYena. Ho a tshwana, kajeno. Modimo o tla tlatsa tempele e nngwe le e nngwe e tla inehela ho Yena ka ho ferella, batho bafe feela ba ka etsang hoo. Tempele hase mohaho ona mona. Tempele hase eo e Salt Lake City. Tempele hase eo e Roma. Tempele ke lona. Ke lona tempele eo Modimo a batlang ho aha ho yona le ho Iponahatsa ka yona, ditjhaba tsohle di tle di Mo tsebe. Lona le ditshwantsho tse phelang tsa Modimo, tseo Modimo a batlang ho sebetsa ka tsona. Mme nako le nako ha monna kapa mosadi a ka lebala mafosisa wohle ao ba utlwileng lefatsheng, mme ba kgutlele motjheng wa Lengolo, le ho dula motjheng.

<sup>92</sup> Jwalo feela, ka ha Salomone a entse ho seo Moshe a se entseng. Moshe a entse ho seo Modimo a se entseng. Ha e sa le Modimo a se hlompha.

<sup>93</sup> Empa ha re ka kgutlela kgakolong ya tshimoloho mme ra bula dipelo tsa rona le ho phophotha borona, Modimo, kgakolong, ha re Mo abela yona, o tla tlatsa tempele ya rona ka kganya ya Hae ya Shekina. Ebe moo Modimo ya phelang a tla tsamaya ka hara Kereke e phelang, mahareng a batho ba phelang, mme o tla phuthulla kganya ya Hae. Ebe, mmoho, ka tsatsi le le leng, e mong a le *tjena*, le e mong a le *tjena*, le e mong a le karolong e nngwe ya naha, O tla kopana mmoho ho bopa Monyaduwa. Re tla nkelwa sebakeng, ho kopana le Yena.

<sup>94</sup> Jwale, kereke ena e ratehang, mohaho ona oo batho, ka mesebetsi ya bophelo ba bona, ka lerato la bona ho Kreste, barapedi ba e kgakolang, kajeno, nqalo ena ya ho rapela, eo batho ba ka tlang mme ba rapela. Jwale, thapelo ya ka e tshepehang ke hore borapedi bo bong le bo bong e tle e... morapedi e mong le e mong a ke a kgakole tempele ya hae ka boyena, ho rapela, ka hara tempele e kgakoletsweng ho rapela. Ke eo kgakolo ya makgonthe.

<sup>95</sup> E re ka ha nako ya rona e ile, empa Modimo ha a na nako. Ha re hopoleng. Nako e fetile ha kae? Ke shebile batho ba hodileng. Ho ka ba morao ho feta kamoo le nahananang. Ke shebile batho ba batjha, bananyana.

<sup>96</sup> Shebang, bana ba banyenyane bana ba fumanweng, ba ponngwe, tsatsi le leng, basetsana bao ba rusolotswe. Ho shwa ba bakae ba bona ka selemo? Dikete, ka mafu a pelo, mofetshe, pholio, ntho efe feela e ka ba bolayang, dikotsi mmileng.

<sup>97</sup> Ha re tsebe, o le motjha ha kae kapa o tsotfetse ha kae, nako eo e tla fihla neneng? Karete ya hao e tla hulwa neneng rakeng? Ha ho motho ya tsebang ha e se Modimo. Ke hantle.

<sup>98</sup> Jwale e re sa ttile kwano, kajeno, kgakolong ya sesebediswa sena mona, moo barapedi ba tlang ho rapela Modimo o phelang, hobaneng re sa inehelo ho rapela Modimo o phelang, mme re Mo dumelle ho re tlatsa ka sebele sa Hae? Mme ke moo re tla bona kganya ya Shekina e kgutlela tlung ya Modimo o phelang, e leng mmele wa motho, Kereke ya Modimo o phelang, mmoho, ka tsoseletso e kgolo e tla haola naheng ena, ho potola metse ena, le hohle mona. Ho tla ba le lerata le leholo. Kgele, ba—ba ne ba ka sitwa ho e thodisa. Ha ho mokgwa wa ho e etsa.

<sup>99</sup> Le nahana le ne le ka thodisa Setefanase? Kgele, o ne a tshwana le—le ntlo e tjhang nakong ya sefefo. Kgele, le ne le tla sitwa ho mo thiba. Esita le Sanhedrine e sitilwe ho mo thiba. Mme, le a tseba, esita le lefu ka bolona le sitilwe ho mo thiba. A nna a phela. Mme kajeno o a phela. Mme o tla phela kamehla, hoba a ne a na le Bophelo bo sa Feleng, mme e le ntlo e kgakoletsweng tshebeletso ya Modimo.

<sup>100</sup> Ke nahana ntho eo kereke ena e ka e etsang, hoseng hona, ho hlompha tsohle tse entsweng: ha re nehela Modimo mohaho, bakeng sa tshebeletso, le rona, re ke re inehelo.

Ha re emeng motsotsa jwale.

<sup>101</sup> E mong le e mong ka tsela ya hao, ka tsela e ikgethang eo o ratang ho rapela ka yona. Ke ikgakola botjha kajeno, sefaleng, tshebeletsong ya Modimo. Ke batla e mong le e mong wa lona a etse hoo. Re sa kgakolela mohaho ho Modimo, le rona ha re ikgakoleng.

<sup>102</sup> Ntat'a rona ya Mahodimong, re phuthehile mona hoseng hona ka boikokobetso le ka botshepehi bo shweletseng, dikananelong tse kgolo tsa lerato leo O le bontshitseng phutheho ena, ho ba fa mohaho ona ho rapela, le ho fa phutheho ena molebedi enwa, moreri wa Lentswe.

<sup>103</sup> Mme jwale, Ntate ya Mahodimong, jwalo ka sebaka se kgakolelwang thapelo, rona jwalo ka barapedi re suthisa ntho e nngwe le e nngwe, ho se dumele ho hong le ho hong, mohopol o mong le o mong o sa lokang, ntho e nngwe le e

nngwe e sa tshwaneng le Wena, le ntho efe feela e ka sebetsang ka ho rona kgahlano le Lentswe la Hao; ntho efe feela, tumelwana efe feela, mohopolo ofe feela wa phutheho e hlophilweng, kapa mohopolo ofe feela oo motho ya haufi kapa motho e mong, ya leng mona kapa mane, kapa kae feela, o ka re fihlelang e le mohopolo wa motho enwa, leha a iketse, leha e ka ba lefiso le halalelang, le hlatswitsweng; ntho efe feela, motho ofe feela, kapa Lengeloi, kapa sebopuwa, kapa tshenolo, kapa ntho efe feela e ka bang kgahlano le leano la Hao la matsatsi ana ao ho builweng ka wona Lentsweng la Hao. E seng seo motho a se buileng; empa seo O se buileng! Hoba ho ngodilwe, “Mantswe a motho e be leshano, mme la Ka ke nnete.” Ha ho e na le ntho e re thibelang ho dumela Lentswe la nnete, homme re tseba tshenolo ya Kreste, jwalo ka ha A buile ho Petrose, “Hodim’ a lefika lena, Ke tla haha Kereke ya Ka.” Ha ho e na le ntho e kgahlano le seo, e tlose ho rona, Morena. Re e suthisetsa thoko, ka borona. Re e lelekela ka ntle. Mme re amohela sebakeng sa yona, lejwe la Sehlooho la Sekhutlo, Moya o Halalelang e leng motheo wa Kereke ya nnete ya Modimo. Re amohela hoo.

<sup>104</sup> Ntate, hlohonolofatsa kerekana ena. Baballa mehaho ena e eme, mme barapedi ba ke ba phuthehele kwano, nako le nako, tshebeletsong e nngwe le e nngwe. Ho be le lerato la Modimo le le ngata hakana hara bona, hoo ba tla sitwa ho arohana, dipelo tsa bona di tla labalabela ho kopana, tlung ya Modimo. Fana ka sena, Morena.

<sup>105</sup> Mme bao e ke e be letswai hakaalo, jwalo ka ha O boletse, “Le letswai la lefatatshe.” Maphelo a bona a ke a anafale mme a phethehe Moyeng o Halalelang, hofihlela setjhaba sohle ka mathoko se tla labalabela ho tshwana le bona. Fana ka sena, Morena. Ba etse mehlala. Fana ka sena, Ntate.

<sup>106</sup> Jwale, tshwara e mong le e mong wa rona, re sa nehela kereke, mohaho, ho Wena. Le rona re inehela ho Wena, ka boinehelo bo boholo. Mme Moya o Halalelang ka Matla a Hae wohle a Kgethehileng, ka kganya ya Hae ya Shekina, o tle o theoha o lepella ka bosafeleng bohle, ho kena dipelong tsa rona, Morena, ho fumana madulo a Hae bakeng sa matsatsi ana a qetelo. Le ho re biletsha motsebetsing, jwalo ka baromuwa, mohlomong e sang sefaleng, empa seteisheneng sa mafura, bateng e hlatswetsang, hohle feela, ho pakela ralebese, moshanyana wa dikoranta, kapa seo e ka bang sona. Re fetole bopaki le majwe a phelang a tlatsitsweng ka kganya ya Shekina, Moya o Halalelang, ka sebele sa Hae. Tlatsa dipelo tsa rona le maphelo, Ntate.

<sup>107</sup> Mme mohla ditshebeletso di fedileng, mona hodima lefatshe, re ke re kopane mmoho re sa arohana, re renngwe ka ditsela tsa rona tseo Modimo a re entseng ka tsona, Kerekeng e kgolo eo, e bitswang Monyaduwa. O tla nnkuwa

motlotlwaneng ona wa leaho la lefatshe mona, mme O tla fetolwa ka motsotso, ka ho panya ha leihlo. Mme O tla hlbibilwa mmoho le Yena, ho kopana le Yena sebakeng, ho ya Selallong sa Lenyalo la Konyana. Hoba re inehela ka borona, mmoho le kereke ena, ka kgalalelo le boikhetho boo re bo kgonang, Ntate, tshebeletsong ya Hao, ka Lebitso la Jesu Kreste. Amen.

Le ka dula fatshe.

<sup>108</sup> Ke ba bakae ba lona ba reng, “Ka mohau wa Modimo, le ka thuso ya Modimo, ke tela pelo ya ka. Tloo, Morena Jesu, mme o ntlatse feela ka ho loka ha Hao. Ak’o nketse seo O batlang ke be sona. Ha eba ke le kgahlano, le moseho oo O mpeileng wona, motsamao, etswe ke na le tokelo ya ho hatela ka *mona* kapa ka *mane*, o se ntumelle ho ba lejwe le sehilweng ka phoso, ke mpe ke ikokobeletse saga e nketsang seo ke leng sona, seo O mpatlang ke le sona”? Re e batla ka tsela eo, ha ho jwalo? [Phutheho e re, “Amen.”—Mong.]

<sup>109</sup> Ha re phahamiseng matsoho a rona jwale mme re bine sefela sena sa kgale se tlotlehang sa kereke, ke sa fetisetsa tshebeletso ya lona ho modisa wa lona.

Ke a Mo rata, ke a Mo rata  
 Hoba A nthatile pele  
 Mme O lefe’tse poloko ya ka  
 Fateng sa Kalvari.

<sup>110</sup> Jwale ha re e bineleng ka marameng. [Moena Branham o qala a binela *Ke A Mo Rata* ka marameng—Mong.] Jwale tsukutla matsoho le moahisane wa hao, e re, “Modimo a o hlo’nolofatse, moena, lejwe le ka hara Kereke.” Mme Modimo a o hlo’nolofatse, moena, majwe a ka hara Kereke. Modimo a o hlo’nolofatse, moena. Modimo a o hlo’nolofatse. Modimo a o hlo’nolofatse, moena. Modimo a o hlo’nolofatse. Modimo a o hlo’nolofatse, moena.

A nthatile pele  
 Mme O lefe’tse poloko ya ka  
 Fateng sa Kalvari.

<sup>111</sup> Jwale ha re kwaleng mahlo a rona, re inamiseng hlooho tsa rona, mme re phahamisetse matsoho ao a mabedi ho Yena.

Ke a Mo rata, ke a Mo rata  
 Hoba O nthatile pele  
 Mme O lefe’tse poloko ya ka  
 Hodim’ a Kalvari.



*KGAKOLO* SST62-1111M  
(Dedication)

Molaetsa wona o tlileng ka Moena William Marrion Branham, o rerilweng tshimolohong ka Senyesemane ka Sontaha hoseng, Pudungwana 11, 1962 mane kerekeng ya Full Gospel Apostolic, mane Elizabethtown, Kentucky, U.S.A., o ntshitswe mabanteng a kgatiso a makenete mme o ngotswe o sa kgutsufatswa ka Senyesemane. Phetolelo ena ya Sesotho sa Borwa e phatlaladitswe ka 2003 ke ba ha:

©2003 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)